

Inuit innarluutillit illersuisuat pillugu Inatsisartut inatsisissaattut siunnersuut nr. xx, xxx 2017-imeersoq

(Isumaginninnermut, Ilaqtariinut, Naligiissitaanermut Inatsisinillu Atuutsitsinermut Naalakkersuisunut ilaasortaq)

Akissuteqaat

(Isumaginninnermut, Ilaqtariinnut, Naligiissitaanermut Inatsisinillu Atuutsitsinermut Naalakkersuisoq)

Aappassaaneernera

Ilaqtariinnermut Peqqissutsimullu Ataatsimiititaliap Inuit innarluutillit illersuisuat pillugu inatsisissatut siunnersuummut atatillugu sulilluarsimaneranut kiisalu inatsisissatut siunnersuutip tiglluuarsimaneranut Naalakkersuisut qujaniarput.

Ataatsimiititaliap isumaliutissiisummini inunnut innarluutilinnut isumaginninnerup nuunneqarnerata naliliiffiginera 14. april 2016-imeersoq innersuussutigaa. Naalakkersuisut erseqqissarusuppaat inunnut innarluutilinnut suliassaqarfimmi unammilligassat amerlaqimma ilisimagatsigu. Inuit innarluutillit illersuisuat pillugu inatsisissatut siunnersuut manna aqqutigalugu unammilligassat tamakku ilaat qaangerniarneqarsinnaajumaartut neriuutigaarput.

Tamannalu nangillugu pingaaruteqarpoq erseqqissassallugu inuit innarluutillit atugarisaannik pitsanngorsaaneq qulakteerniarlugu suliniartoqassappat pisariaqarmat oqartussaasoqarfii assigiinngitsunik suliallit kiisalu naalakkersuisoqarfii akimorlugit suliniuteqarnissaq, matumanilu assersuutigalugu ineqarnermut, ilinniartitaanermut suliffeqarnerullu suliassaqarfii ilanngullugit.

Ataatsimiititaliap isumaliutissiisummini Inunnut innarluutilinnut Illersuisup nunatsinni nunanilu allani suleqatissarsiornissa kaammattutigaa. Ataatsimiititaliamit suliatigut ataatsimoortoqarnera suleqatigitoqarsinnaaneralu nukittuunngortitsisarmata ataatsimiititaliap isumaanut Naalakkersuisut isumaqataapput, naatsorsuutigalugulu Inunnut innarluutilinnut Illersuisoq Nunatsinni avataanilu suleqatissanik attuumassuteqartunik pilersitsiumaartoq.

Aningaasanut inatsimmi aningaasanut immikkoortinneqareersunut tunngatillugu aningaasat taaneqartut naammattussatut Naalakkersuisut nalilerpaat.

Tamatuma saniatigut Naalakkersuisut ilisimareerpaat aningaasaqarnikkut sulinkkullu suliffeqarfimmik allamik ininik avitseqateqarnissaq iluaqutaasinnaassasoq, taamaammallu tassuuna periarfissat misissorneqalereersimammata.

Taamatut oqaaseqarlunga inatsisissatut siunnersuutip Inatsisartuni suliarilluarnissaa Naalakkersuisut inassutigaat.